

so frembde
weiber
genommen
etc.

Vnd Esra der Priester stund auff / vnd sprach zu jnen / Ir habt euch vergriffen / das jr frembde Weiber genomen habt / das jr der schuld Israel noch mehr machtet. So bekennet nu dem **HERRN** ewr veter Gott / vnd thut seinen wolgefallen / vnd scheidet euch von den Völkern des Lands / vnd von den frembden weibern.

DA antwortet die ganze Gemeine / vnd sprach mit lauter stimme / Es geschehe / wie du vns gesagt hast. Aber des volcks ist viel / vnd regenicht wetter / vnd kan nicht hauffen stehen / So ist's auch nicht eines oder zweier tage werck / Denn wir habens viel gemacht solcher vbertretung. Lass vns vnser Obersten bestellen in der ganze Gemeine / das alle die in vnsern Stedten / frembde weiber genomen haben / zu bestimpten zeiten komen / vnd die Eltesten einer jglichen Stad / vnd jr Richter mit / bis das von vns gewendet werde der zorn vnser Gottes / vmb dieser sache willen.

DA wurden bestellet Jonathan / der son Asabel / vnd Jehasja / der son Tikwa / vber diese sachen / vnd Mesullam vnd Sabthai die Leuten hulfen jnen. Vnd die kinder des Gefengnis theten also. Vnd der Priester Esra vnd die fürnehmsten veter vnter irer veter hause / vnd alle jzt benante / scheideten sie / vnd sagten sich am ersten tage des zehenden monden zu forschen diese sachen. Vnd sie richtens aus an allen Mennern die frembde Weiber hatten / im ersten tage des ersten monden.

Vnd es wurden funden vnter den kindern der Priester die frembde weiber genomen hatten / nemlich / vnter den kindern Jesua / des sons Jozadak / vnd seinen brüdern / Maeseja / Elieser / Jarib vnd Gedalja. Vnd sie gaben ire hand drauff / das sie die weiber wolten austossen / vnd zu irem Schuldopffer einen Wider für ire schuld geben. Vnter den kindern Immer / Hanani vnd Sebadja. Vnter den kindern Harim / Maeseja / Elia / Semaja / Jehiel / vnd Vsia. Vnter den kindern Pashur / Elioenai / Maeseja / Ismael / Aethaneel / Josabad vnd Eleasa. Vnter den Leuten / Josabad / Simej vnd Belaja (Er ist der Klita) Pethathja / Juda vnd Eliezer. Vnter den Sengern / Eliasib. Vnter den Thorhütern / Sallum / Telem vnd Uri.

Vnd Israel / Vnter den kindern Pareos / Ramja / Jesia / Malchja / Mejamin / Eleasar / Malchia vnd Benaja. Vnter den kindern Elam / Mathanja / Sacharja / Jehiel / Abdi / Jeremoth vnd Elia. Vnter den kindern Sathu / Elioenai / Eliasib / Mathanja / Jeremoth / Sabad vnd Asisa. Vnter den kindern Bebai / Johanan / Hananja / Sebai vnd Athlai. Vnter den kindern Bani / Mesullam / Malluch / Adaja / Jasub / Seal vnd Jeremoth. Vnter den kindern Pahath Moab / Adna / Chelal / Benaja / Maeseja / Mathanja / Bezaleel / Benui vnd Manasse. Vnter den kindern Harim / Elieser / Jesia / Malchia / Semaja / Simeon / Ben Jamin / Malluch vnd Samarja. Vnter den kindern Hasum / Mathnai / Mathatha / Sabad / Eliphelet / Jeremai / Manasse vnd Simej. Vnter den kindern Bani / Maedai / Amram / Huel / Benaja / Bedja / Chelui / Naia / Meremoth / Eliasib / Mathanja / Mathnai / Jaesau / Bani / Benui / Simej / Selemja / Nathan / Adaja / Nachnadbai / Sasai / Sarai / Asareel / Selemja / Samarja / Sallum / Amarja vnd Joseph. Vnter den kindern Nebo / Jeiel / Mathithja / Sabad / Sebina / Jaddai / Joel vnd Benaja. Diese hatten alle frembde weiber genomen / Vnd waren etliche vnter denselben weibern / die kinder getragen hatten.

Ende des Buchs Esra.

f. iii

DJs sind